

OBOR

BELIA

BUKU 7

AKU PERCAYA

(PENGAKUAN IMAN RASULI)



Penerbitan Kristian

OBOR BELIA

Penulis (Bahasa Inggeris): Goh Kim Guat

Kim Guat aktif dalam pelayanan belia dan kanak-kanak. Dia telah memperoleh B.A. (Hons) di Bryn Mawr College, U.S.A. dan M.Ed. di Harvard Graduate School of Education.

Penulis & Penterjemah: Evelyn Tan Hwee Yong

Hwee Yong telah lama berkecimpung dalam penulisan dan penterjemahan, dan telah menulis banyak buku dalam Bahasa Malaysia. Dia memperoleh M.A. Theology dari South East Asia Bible College, dan M. Human Sc. dari Universiti Islam Antarabangsa.

Penyunting: Randy Singkee

Randy banyak terlibat dalam penulisan dan penterjemahan sejak tahun 1993. Dia memperoleh B.A. (Hons) dari Universiti Malaya dan M.Sc. dalam bidang Geographical Information Systems (GIS) dari University of Edinburgh, UK.

Cetakan Pertama : April 2010

Cetakan Kedua : November 2011

Penerbit : Wawasan Penabur Sdn. Bhd.
wawasan.penabur@gmail.com

Pencetak : Akitiara Corporation Sdn. Bhd.

Kulit Buku : Randy Singkee

Artis Ilustrasi : Renno Mario Liwas

Petikan Alkitab diambil dari

Alkitab Berita Baik © 1996, Bible Society of Malaysia

Alkitab Terjemahan Baru © 1974, Lembaga Alkitab Indonesia

Hakcipta © 2010 Wawasan Penabur Sdn. Bhd.

Hak Cipta terpelihara. Tidak dibenarkan mengeluarkan mana-mana bahagian artikel, ilustrasi, dan isi kandungan buku ini dalam apa jua bentuk dan dengan cara apa jua sama ada secara elektronik, fotokopi, mekanik, rakaman atau cara lain sebelum mendapat izin bertulis daripada Penerbit.

Isi Kandungan

1	Sebelum Anda Bermula
4	Mukadimah: Aku Percaya
5	Pengakuan Iman Rasuli

Lembar Kerja

6	Sesi 1: Allah Bapa, Pencipta Langit dan Bumi
12	Sesi 2: Yesus Kristus, Anak-Nya yang Tunggal
16	Sesi 3: Kristus Yesus, Tuhan dan Penyelamat
20	Sesi 4: Roh Kudus, Allah Dalam Kita
26	Sesi 5: Gereja Tuhan, Kudus dan Am
32	Sesi 6: Yesus Tuhan, Hakim Orang Hidup dan Mati
36	Sesi 7: Alkitab, Buku Terlaris
40	Sesi 8: Alkitab, Bolehkah Ia Dipercayai?

Panduan Pembimbing

45	Sesi 1
48	Sesi 2
51	Sesi 3
54	Sesi 4
56	Sesi 5
59	Sesi 6
62	Sesi 7
66	Sesi 8

Sebelum Anda Bermula...

Memperkenalkan **OBOR BELIA**

OBOR BELIA dituliskan sebab:

- Para belia dan muda-mudi masih mencari program yang lebih berkesan dan yang dapat memenuhi keperluan mereka.
- Para belia dan muda-mudi masih kekurangan pembelajaran sistematik yang dapat meletakkan dasar iman teguh di tengah-tengah tekanan kehidupan moden ini.
- Kebanyakan buku pemuridan tidak dituliskan menurut konteks dan masalah-masalah yang dihadapi oleh belia dan muda-mudi yang hidup sebagai umat Tuhan di negara ini.

OBOR BELIA merupakan kurikulum yang memuat kaedah-kaedah kreatif dan praktikal agar Injil dapat disampaikan sesuai dengan keperluan para belia dan muda-mudi zaman sekarang. Kurikulum ini diolah untuk generasi muda Tubuh Kristus supaya mereka mengenal iman mereka secara mendalam dan hidup setia sebagai umat Tuhan di negara ini. Kurikulum ini akan memberi anda peluang untuk berbincang, bertukaran pendapat, berdoa bersama, belajar daripada satu sama lain, dan berseronok bersama. Setelah mempelajari kurikulum ini, anda akan mengetahui bahawa menjadi seorang Kristian memang relevan, mencabar, teruja dan anda akan menemui apa yang anda kehendaki untuk kehidupan anda.

Cara Menggunakan **OBOR BELIA**

OBOR BELIA dicorakkan untuk pertemuan mingguan yang boleh digunakan di persekutuan di sekolah, rumah atau gereja. Anda juga boleh mengubahsuainya untuk kelompok kecil anda.

Siri buku ini mempunyai dua bahagian besar: Lembar Kerja dan Panduan Pembimbing yang memberi panduan dan aktiviti-aktiviti kreatif untuk topik-topik buku ini.

Panduan Pelajar terdiri daripada Kata-Kata Mutiara, Ayat Mas Alkitab, Aktiviti Bersama, Renungan Firman Tuhan, Renungan Peribadi dan Doa. Panduan Pembimbing pula mempunyai tiga aspek tambahan iaitu Objektif-Objektif Sesi, Aktiviti Pencetus Minat, Jawapan Firman

Tuhan serta kaedah ajaran yang boleh digunakan.

Pembimbing atau pemimpin kelompok harus membaca Lembar Kerja dan Panduan Pembimbing untuk memahami seluruh pelajaran ini dan cara menyelenggarakannya.

Dalam Siri Buku **OBOR BELIA** ini, anda akan menemui yang berikut:



Ayat Mas Alkitab

Ayat ini merupakan ayat yang penting dan perlu direnungi bersama kelompok anda.



Kata-Kata Mutiara

Baca bersama ahli-ahli kumpulan anda dan jelaskannya secara singkat.



Aktiviti Bersama

Bahagian ini memperkenalkan tema utama sesi ini dengan menggunakan pelbagai permainan, lakonan, kertas kerja atau cara yang menarik untuk mencetus minat para peserta.



Renungan Firman Tuhan

Bahagian di mana Firman Tuhan akan dibentang dan dibincangkan. Pelbagai aktiviti dirancang agar mereka dapat melibatkan diri dalam Firman Tuhan.



Renungan Peribadi

Bahagian ini menggabungkan cara-cara kreatif dan praktikal untuk menggalakkan mereka merenungi pelajaran hari itu serta menerapkan kebenaran yang telah dipelajari untuk kehidupan mereka, dan bukan sekedar mengetahuinya sahaja.




Doa

Pembimbing dan peserta digalakkan menutup setiap sesi dengan doa.

Untuk Pemimpin/Pembimbing

Panduan untuk memimpin dan membimbing sesi disediakan di bahagian akhir buku ini. Anda akan dibekalkan dengan nota-nota tambahan untuk setiap bahagian dalam sesi di Lembar Kerja.



Objektif-Objektif Sesi

Bahagian ini menjelaskan dengan terperinci objektif-objektif sesi. Pembimbing mesti membaca objektif-objektif ini sebelum memulakan pelajaran.



Pencetus Minat

Mencadangkan beberapa teknik pemanasan dan pencetus minat para pelajar dengan menggunakan permainan, lakonan, dan sebagainya.



Aktiviti Tambahan

Aktiviti atau pelajaran tambahan yang diolah untuk memperkuatkan lagi pengajaran Alkitab atau satu pernyataan.

Beberapa Panduan Berguna

*** Baca**

Baca bahagian Lembar Kerja dan Panduan Pembimbing jika anda sedang membimbing satu kelompok supaya anda boleh berfikir dan menyiapkan diri dengan mantap.

*** Doa**

Berdoa agar Tuhan memberi anda kebijaksanaan sewaktu mengendalikan topik dalam perbincangan. Jangan lupa berdoa agar Tuhan menyentuh dan mengubah kehidupan ahli-ahli kumpulan anda.

*** Persiapan**

Bahagian Renungan Firman Tuhan memerlukan paling banyak bimbingan dan ajaran daripada anda. Renungkan contoh-contoh yang dapat menolong anda menjelaskan ajaran anda dalam bahagian lain.

*** Santai & Ketawa**

Jangan terlalu serius dan kalau boleh berjenakalah sekali-sekala. Biar proses pembelajaran itu lebih berinteraksi, partisipasi dan santai.

Mukadimah

Mengapa belajar Pengakuan Iman Rasuli? Bukankah Pengakuan Iman Rasuli itu lafazan yang paling kuno? Walaupun pengakuan ini paling kuno namun ia merupakan ajaran-ajaran Kristian yang paling dasar dan penting. Pengakuan iman ini sering dilafazkan di gereja pada waktu ibadah umum sejak zaman dahulu.

Tuhan Yesus pernah bersabda bahawa kalau kita ingin membangun rumah, kita mesti mempunyai landasan yang kukuh dan tahan lasak. Iman yang kukuh akan berdiri teguh di tengah-tengah angin badai dan taufan. Bangunan yang didirikan di atas pasir akan roboh apabila ajaran palsu mengancam.

Pengakuan Iman Rasuli memberi kesimpulan tentang ajaran-ajaran inti para rasul namun ia tidak dituliskan oleh mereka. Sudah menjadi di kebanyakan gereja tradisional untuk mempelajari Pengakuan Iman Rasuli, Sepuluh Hukum dan Doa Tuhan (Doa Bapa Kami) sebelum mereka dibaptiskan.

Pengakuan Iman Rasuli dalam Bahasa Inggeris ialah "*Apostle Creed*." "*Creed*" dalam bahasa Latinnya bererti "Aku Percaya", yang merupakan satu pengakuan iman dasar. Pengakuan ini boleh dilafazkan oleh semua anak Tuhan pada bibir dan hati. Buku ini akan menolong para peserta memahami doktrin dasar iman Kristian dan yang lebih penting lagi, iman mereka kepada Tuhan Yesus.

Pengakuan Iman Rasuli bermula dengan permulaan segala sesuatu iaitu Ciptaan Dunia, Tuhan Pencipta Langit dan Bumi, kepercayaan tentang Anak-Nya, Roh Kudus dan diakhiri dengan hidup yang kekal. Buku ini akan mencabar anda untuk membangun landasan iman yang kukuh dalam kehidupan anda.

"Ya, Tuhan, aku percaya, bahwa Engkaulah Mesias, Anak Allah, Dia yang akan datang ke dalam dunia." (Yohanes 11:27)

Pengakuan Iman Rasuli

Aku percaya kepada Allah,
Bapa yang Maha Kuasa,
Pencipta langit dan bumi.
Aku percaya kepada Yesus Kristus,
Anak-Nya yang tunggal, Tuhan kita.
Aku percaya Yesus dikandung daripada Roh Kudus.
Aku percaya Yesus dilahir daripada anak dara Maria.
Aku percaya Yesus menderita di bawah
pemerintahan Pontius Pilatus.
Aku percaya Yesus disalibkan.
Aku percaya Yesus mati dan dikuburkan,
turun ke kerajaan maut.
Aku percaya pada hari ketiga Yesus bangkit pula
daripada antara orang mati.
Aku percaya Yesus naik ke syurga.
Aku percaya Yesus duduk di sebelah kanan Allah,
Bapa yang Maha Kuasa.
Aku percaya dari sana Yesus akan datang
untuk menghakimi orang yang hidup dan yang mati.
Aku percaya kepada Roh Kudus.
Aku percaya gereja yang kudus dan am.
Aku percaya persekutuan orang kudus.
Aku percaya pengampunan dosa.
Aku percaya kebangkitan tubuh,
Aku percaya hidup yang kekal.
Amin.

Allah Bapa, Pencipta Langit dan Bumi





Ayat Mas Alkitab

“Sebab kamu tidak menerima roh perbudakan yang membuat kamu menjadi takut lagi, tetapi kamu sudah menerima Roh yang menjadikan kamu anak Allah. Oleh Roh itu kita berseru: ‘ya Abba, ya Bapa!’”
(Roma 8:15)



Kata-kata Mutiara

Tuhan kita bukan hanya Pencipta yang wujud tetapi Dia juga Pencipta yang mengasihi kita dan memanggil kita untuk menjadi anak-anak-Nya.



Aktiviti Bersama

Bapa Duniawi & Bapa Syurgawi

Kalau anda diberikan kesempatan untuk memilih seorang bapa seperti anda memilih buku-buku dari rak buku, jenis bapa yang bagaimanakah yang akan anda pilih? Allah kita juga dipanggil Bapa. Menurut anda, apakah kesamaan yang wujud jika kita bandingkan antara bapa duniawi kita dengan Allah Bapa Syurgawi kita? Isikan yang di bawah.

Bapa yang saya ingini	Ciri-ciri kesamaan dengan Allah Bapa



Renungan Firman Tuhan

A. Tuhan Pencipta

1. Siapakah yang mencipta langit dan bumi? (Kejadian 1:1; Ibrani 1:2)
2. Setujukah anda dengan pendapat yang mengatakan setelah Tuhan menciptakan dunia ini, Dia telah membiarkan dunia ini berjalan sendiri seperti pembuat jam? (Yesaya 40:25-28)
3. Apakah suatu hal yang akan menyebabkan anda selalu bersyukur dan bergembira atas ciptaan Tuhan? (Mazmur 139:13-14)
4. Pencipta yang mencipta anda juga memberi anda satu keyakinan besar. Apakah keyakinan itu? (Yeremia 31:1)

B. Tuhan Bapa Kita

5. Bagaimanakah kita menjadi anak-anak Allah? (Galatia 4:4-7)
6. Siapakah yang hidup dalam anda sehingga anda boleh menyeru “ya Abba, ya Bapa!”? (Roma 8:15)
7. Allah Pencipta adalah seperti bapa kita. Nyatakan tiga hal yang telah dilakukan-Nya terhadap kita? (Mazmur 121)
 - (i)
 - (ii)
 - (iii)

8. Sifat dan sikap Allah adalah seperti bapa kita memperlakukan kita. Baca Mazmur 103:8-14 dan jelaskan bagaimana Allah memperlakukan kita.
9. Selain menjadi Bapa kepada kita, bagaimanakah Allah menunjukkan Diri-Nya sebagai Bapa kepada anak yatim? (Mazmur 27:10)
10. Sebagai anak Tuhan, kita juga akan diperlakukan dengan adil dan saksama. Bagaimanakah Allah akan memperlakukan kita? (Ibrani 12:5-11)



Renungan Peribadi

Tuliskan sepucuk surat kepada Bapa Syurgawi anda dan bercakap dengan Dia secara intim seperti seorang anak kepada bapanya. Ucapkan terima kasih kerana Dia telah mencipta anda, memberi segala yang anda perlukan. Dia melakukan semua ini kerana Dia, Bapa Syurgawi mengasihi kita bukan kerana kita layak menerimanya.

Santapan Minda

Doa Pagi Luther Kepada Bapa Syurgawi

Kami mengucapkan syukur kepada-Mu, Bapa Syurgawi,
Melalui Anak-Mu yang dikasihi.
Engkau telah melindungi kami sepanjang malam
dari bahaya dan ancaman.
Kami memohon agar Engkau akan melindungi dan menjaga kami,
pada hari ini juga dari segala dosa dan kejahatan;
supaya dalam fikiran, perkataan mahupun tingkah laku kami,
kami dapat melayani dan menyenangkan hatimu.
Ke dalam tangan-Mu, kami menyerahkan tubuh-tubuh kami
dan jiwa kami dan segala yang berada dalam diri kami.
Biar malaikat-Mu menjaga kami
agar si jahat tidak ada kuasa atas kami.
Amin.



Doa

Berdirilah dalam lingkaran dan naikkan doa kepada Tuhan. Ucapkan syukur kepada Allah yang telah menjadi Bapa Penyayang yang memerhatikan anda dan selalu membimbing anda. Juga puji Tuhan yang telah menjadi Bapa kita yang mengetahui segala keperluan dan masalah kita.

Yesus Kristus, Anak-Nya yang Tunggal





Ayat Mas Alkitab

“Aku datang supaya mereka mempunyai hidup. Dan mempunyai dalam segala kelimpahan.” (Yohanes 10:10b)



Kata-kata Mutiara

Yesus ialah Anak tunggal Allah yang telah datang ke dunia ini untuk menyelamatkan kita daripada dosa supaya kita boleh mengenal Dia dan menikmati hidup yang kelimpahan.



Aktiviti Bersama

Kuiz 3 Minit

Tanda **B** (Betul) atau **S** (Salah) untuk pernyataan-pernyataan di bawah:

1. Dalam Kristus telah diam seluruh kepenuhan ke-Allahan	
2. Barangsiapa yang melihat Yesus, telah melihat Allah Bapa.	
3. Yesus adalah Pencuri yang mencuri nyawa domba-domba-Nya.	
4. Kristus Yesus telah mati untuk kita di kayu salib kerana kita terlalu baik dan manis.	
5. Yang mati di kayu salib bukan Kristus Yesus kerana Allah tidak mengizinkannya. Dia tidak mengalami kesengsaraan.	
6. Tuhan Yesus mati pada zaman pemerintahan Pontius Pilatus.	
7. Kita patut sedih kerana Tuhan Yesus yang bangkit ke syurga dan Dia tidak akan kembali selama-lamanya.	
8. Dia duduk di kiri Bapa-Nya sekembali ke syurga.	



Renungan Firman Tuhan

Anda akan dibahagikan kepada beberapa kelompok. Setiap kelompok akan menyiasat ayat-ayat berikut dan kemudian membuat laporan tentang siapakah Yesus. Setelah kelompok anda menyelidiki ayat-ayat ini, berikan satu judul dan sampaikan penemuan-penemuan anda kepada semua orang.

Kajian 1:	Yohanes 1:1-3; 8:56-58; 17:5, 24
Kajian 2:	Yohanes 1:14,18; Kolose 2:9
Kajian 3:	Matius 1:18-25; Lukas 1:26-2:20; Lukas 1:3-35
Kajian 4:	Lukas 22:66-70; Yohanes 10:36-38; Yohanes 17:1-3
Kajian 5:	Markus 1:29-34; Lukas 4:31-37, 41; Matius 8:23-27; Yohanes 11:25, 38-44
Kajian 6:	Yohanes 8:46; Ibrani 4:15; 1 Petrus 2:21-23



Renungan Peribadi

Tuhan Yesus bersabda kepada setiap orang yang mahu mempercayai dan mengikut Dia, "...Aku datang supaya mereka mempunyai hidup, dan mempunyainya dalam segala kelimpahan." (Yohanes 10:10)

Inginkah anda mempunyai kehidupan yang kelimpahan? Lukiskan bintang jika anda mahu pada akhir setiap tawaran berikut.

1. Anda akan dipenuhi dengan kehadiran-Nya yang damai dan penuh kasih.	
2. Anda akan dibimbing oleh Tuhan Yesus melalui Firman Tuhan.	
3. Tuhan akan memberi kekuatan pada waktu kelemahan.	
4. Anda boleh datang kepada-Nya dalam doa pada bila-bila masa sahaja.	
5. Anda akan dilindungi Tuhan.	
6. Anda tidak perlu takut kerana Dia akan menyertai anda setiap masa.	
7. Anda boleh menghadapi masa depan di dunia ini bersama Tuhan Yesus.	

Santapan Minda

Santap pada Kristus, dan kemudian pergi dan menjalani kehidupan anda, dan itulah Kristus yang berada dalam kehidupan anda, yang menolong yang miskin, yang memberitakan kebenaran, yang berperang dan yang memenangi mahkota.


~ Phillips Brooks



Doa

Berdiri dalam lingkaran dan ucapkan syukur kepada Tuhan Yesus yang rela tinggal di dalam kita. Mintalah kepada Tuhan Yesus untuk memberi kita kehidupan yang baru dan berkelimpahan. Biar setiap orang mengambil giliran mengucapkan sepatah dua doa kepada Tuhan Yesus

Kristus Yesus, Tuhan dan Penyelamat





Ayat Mas Alkitab

“Kamu memang sudah bersih kerana firman yang telah Kukatakan kepadamu. Tinggallah di dalam Aku dan Aku di dalam kamu.”
(Yohanes 15:3-4a)



Kata-kata Mutiara

Apabila Tuhan Yesus datang dan tinggal sebagai Penyelamat, Dia memanggil kita untuk menyerahkan setiap sudut kehidupan kita dengan taat kepada-Nya, Penyelamat dan Tuhan kita.



Aktiviti Bersama

Drama

Tuhan Yesus bertemu dengan pelbagai jenis manusia sewaktu Dia berada di dunia. Segolongan manusia dipandang sebagai sampah masyarakat oleh masyarakat mereka. Orang Farisi dan Saduki selalu menganggap diri mereka “sok suci” dan selalu mahu menjebak Tuhan Yesus. Apakah yang dilakukan oleh mereka?

Bahagikan kumpulan anda kepada dua kelompok. Satu kelompok akan membuat satu lakonan moden berdasarkan Yohanes 8:1-11, dan satu kelompok akan memegang ahli teologi yang akan menulis tentang hal ini dalam Berita Harian untuk menjelaskan pandangan dan pendirian mereka dan apa yang diajari oleh Tuhan Yesus mengenai sampah masyarakat. Bentangkan presentasi anda.



Renungan Firman Tuhan

Kehidupan Yang Terperangkap Dalam Dosa

1. Bagaimanakah anda menjelaskan kepada orang yang berkata “saya tidak berdosa dan saya tidak pernah berdosa kerana saya tidak pernah membunuh atau mencuri?” Apakah yang dikatakan oleh Alkitab mengenai hal ini? (Roma 3:10, 23)

2. Apakah akibat dosa kalau tidak ada penyelamatan daripada Tuhan? (Roma 6:23)

3. Bagaimanakah Tuhan menunjukkan kasih-Nya kepada kita? (Roma 5:8)

Kehidupan Yang Terselamat Dari Dosa

4. Apakah yang diberikan oleh Tuhan Yesus kepada mereka yang menerima-Nya? (Yohanes 3:16-18)

5. Apakah yang harus kita lakukan untuk diselamatkan? (Kisah Rasul-Rasul 3:19)

6. Kita perlu berpaling daripada dosa apakah untuk memulakan kehidupan baru? (Galatia 5:19-21)

Kehidupan Yang Terserah Kepada Tuhan

7. Setelah kita diselamatkan daripada dosa kita, bagaimanakah kita harus menjalani hidup kita? (Yohanes 14:21)

8. Kita perlu dicantumkan kepada Siapa? (Yohanes 15:3-4)

9. Bagaimanakah kita boleh hidup kudus? (Roma 12:1)

10. Mengapakah anda patut bersyukur setelah menerima Tuhan Yesus? (Ibrani 13:5b)



Renungan Peribadi

Ambil beberapa minit dan merenungi hal-hal dalam kehidupan anda yang anda rasa tidak berkenan kepada Tuhan. Kemudian tuliskan bagaimana Tuhan ingin anda berubah dalam hal-hal ini.

Cara Saya	Cara Dia dan Perubahan

Santapan Minda

“Seorang Kristian harus menyerupai Kristus Yesus. Anda telah membaca tentang kehidupan Kristus, yang ditulis dengan indah, tetapi yang terindah daripada riwayat-Nya telah dituliskan dan dilukiskan oleh perkataan dan tingkah laku umat-Nya.”

~ Charles Haddon Spurgeon



Doa

Berdoalah agar anda bertumbuh dalam Tuhan. Mintalah kepada Allah untuk menolong anda untuk selalu menurut perintah dan hidup kelimpahan dalam kasih-Nya

Roh Kudus, Allah Dalam Kita





Ayat Mas Alkitab

“Tetapi Penghibur, iaitu Roh Kudus, yang akan diutus oleh Bapa dalam nama-Ku, Dialah yang akan mengajarkan segala sesuatu kepadamu dan akan mengingatkan kamu akan semua yang telah Kukatakan kepadamu.” (Yohanes 14:26)



Kata-kata Mutiara

Tuhan mengutus Roh Kudus-Nya untuk tinggal dalam diri kita agar Dia dapat membimbing dan menguasai kita untuk memenuhi kehidupan kekristianan dengan lebih berkesan dan berkuasa demi untuk nama-Nya.



Aktiviti

Bersama

Ujian Kuasa

Adakah anda sudah ‘memasang’ Roh Kudus dalam kehidupan anda? Jawab soalan-soalan berikut untuk menentukan sama ada lampu picit Roh Kudus anda sudah ‘dipasang’ atau ‘dipadam’.

Jawab setiap soalan di bawah dengan menggunakan skala di bawah.

1 = Tidak Pernah 2 = Biasanya Tidak 3 = Kadang-kadang 4 = Selalu

1. Adakah anda akan merasa bersalah kalau anda berbuat sesuatu yang salah?	
2. Apabila anda melakukan kesalahan, adakah anda berdoa dan mengaku dosa anda kepada Tuhan dengan segera?	
3. Adakah anda rindu meluangkan setiap hari bersama dengan Tuhan?	
4. Adakah anda mendapati Alkitab sungguh bermakna setiap kali anda membacanya?	
5. Adakah anda berdoa dan meminta bimbingan Tuhan setiap kali membuat keputusan yang penting?	
6. Adakah anda rindu datang ke persekutuan seperti ini dan juga beribadah di gereja?	
7. Adakah anda mempunyai kerinduan besar untuk memberitakan Yesus kepada kawan-kawan anda?	
8. Adakah anda mempunyai masalah menunaikan apa yang dikatakan oleh Alkitab?	

9. Adakah anda mempunyai keyakinan dalam hati anda bahawa Tuhan mengasihi anda dan Dia sedang menjaga anda?	
10. Pernahkah kawan-kawan anda atau anggota keluarga anda pernah berkata, “Anda jauh lebih baik daripada yang sebelum ini?”	



Renungan Firman Tuhan

A. Roh Kudus Dalam Perjanjian Lama

1. Dapatkah anda memberi gambaran tentang Roh Kudus daripada dua petikan dalam Perjanjian Lama ini? (Kejadian 8:1; Keluaran 14:21)
2. Apakah yang terjadi kepada Samson apabila Roh Allah menguasainya? (Hakim-Hakim 14:6)
3. Apakah Roh Kudus memampukan Samuel untuk lakukan? (2 Samuel 23:2)
4. Pada zaman Perjanjian Lama, Roh Kudus juga sering mengiringi nabi-nabi. Baca Yehezkiel dan menentukan apakah Roh Kudus memampukannya. (Yehezkiel 2:2, 3:12, 37:1)
5. Bagaimanakah nabi Amos dan Yesaya berbeza daripada nabi-nabi palsu? (Mikha 3:8, Yesaya 42:1)

B. Roh Kudus Dalam Perjanjian Baru

6. Bagaimana Roh Kudus dijelaskan dalam Yohanes 3:8?

7. Bagaimana orang Kristian dipimpin dan diajar oleh Allah? (Yohanes 14:26)

8. Apakah fungsi Roh Kudus dalam kehidupan orang Kristian? (Efesus 3:16-20)

9. Apakah yang diberikan oleh Roh Kudus kepada umat Tuhan dan untuk tujuan apa? (1 Korintus 12:4-11)

10. Bagaimanakah kita mengetahui bahawa kita sedang hidup dalam Roh dan bukan dalam daging kita sendiri? (Galatia 5: 19-23)

**Renungan Peribadi**

Renungi dua kehidupan di bawah dan menandakan mana yang anda miliki. Adakah anda lebih hidup dalam daging atau dalam Roh Kudus?

Diri/Daging	Tandakan	Roh Kudus	Tandakan
1. percabulan		1. kasih	
2. kecemaran		2. sukacita	
3 hawa nafsu		3. damai sejahtera	
4. penyembahan berhala		4. kesabaran	
5. sihir		5. kemurahan	
6. perseteruan		6. kebaikan	

Diri/Daging	Tandakan	Roh Kudus	Tandakan
7. perselisihan		7. kesetiaan	
8. iri hati		8. kelemahanlembutan	
9. roh pemecah		9. penguasaan diri	
10. kedengkian		10. mengampuni	
11. kemabukan		11. melayani	
12. pesta pora		12. kesucian	

Tuhan, saya menyadari bahawa saya lebih berjalan dalam:

Santapan Minda

“Kenapa Allah mengutus Roh Kudus? Ini adalah pertanyaan yang bagus dan mengizinkan kita memiliki lebih daripada satu jawapan. Roh Kudus datang ke atas orang Kristian agar mereka boleh menciptakan dalam diri mereka mutu kehidupan yang tidak mungkin dilakukan dengan kuasa mereka sendiri. Roh Kudus datang ke atas tubuh Kristus agar mereka boleh menikmati dan disatukan dalam persekutuan yang tidak dapat ditandingi oleh kelompok lain... Roh Kudus datang ke murid-murid Tuhan untuk melengkapi mereka bagi misi. Penghibur datang bukan untuk membuat kita selesa tetapi untuk menjadikan kita misionari-misionari.”

~ Michael Green



Doa

Datanglah ke hadirat Tuhan dan memohon agar Roh Kudus memenuhi hidup anda sehingga anda boleh menghasilkan buah-buah Roh Kudus. Selain itu, mintalah Roh Kudus untuk memberi anda karunia untuk melayani tubuh Kristus. Minta agar Tuhan memberi anda kuasa Roh Kudus untuk hidup berkenan kepada Tuhan.

Gereja Tuhan, Kudus dan Am





Ayat Mas Alkitab

“Kerana sama seperti tubuh itu satu dan anggota-anggota banyak, dan segala anggota itu, sekalipun banyak, merupakan satu tubuh, demikian pula Kristus.” (1 Korintus 12:12)



Kata-kata Mutiara

Gereja bukanlah pertubuhan yang memberi perayaan ria yang bersifat sementara sahaja seperti perayaan-perayaan duniawi, tetapi orang Kristian yang dipenuhi oleh Roh Kudus berfungsi sebagai tubuh Kristus yang memainkan pelbagai peranan.



Aktiviti Bersama

Satu tubuh!

Bagagikan kumpulan anda kepada dua kelompok. Satu kelompok akan membayangkan diri mereka baru berkahwin dan mereka akan menulis apa yang diharapkan daripada pasangan hidup mereka. Satu kelompok lagi akan membayangkan mereka semua anggota dalam keluarga yang sama. Anda akan menulis apa yang dianggap sebagai anggota keluarga yang penuh kasih sayang.

Setelah kedua-dua kumpulan ini sudah siap, anda mesti memberi laporan kepada semua orang.



Renungan Firman Tuhan

A. Tubuh Kristus

1. Baca Efesus 5:23
 - a. Apakah perhubungan Kristus dengan gereja?
 - b. Bagaimana gereja boleh digambarkan?
2. Baca Roma 12:4,5. Apakah perhubungan kita dengan anggota lain dalam gereja?

B. Peranan Tubuh

Setiap anggota jemaah berbeza dan diberikan tanggungjawab yang berbeza, Namun, mereka semua adalah sebahagian daripada tubuh Kristus. Baca 1 Korintus 12:14-27.

3. Siapakah yang memberi orang yang percaya pelbagai tanggungjawab dalam tubuh Kristus? (ayat 18)

4. Apakah keinginan-Nya? (ayat 25)

5. Demikian juga, adakah tubuh Kristus mempunyai bahagian yang tidak penting? (ayat 20-23)

6. Sikap apakah yang harus kita percaya terhadap tubuh Kristus? (bulatkan jawapan-jawapan yang betul)
 - a. Kita semua berasal daripada tubuh yang satu
 - b. Kita tidak terlalu berguna
 - c. Kita perlu saling memperhatikan sesama
 - d. Kita memerlukan sesama
 - e. Kita patut menghargai pelayanan sesama kerana kita saling melengkapi

7. Bagaimanakah kita menjelaskan jenis persekutuan gereja seperti yang digambarkan oleh rasul Paulus? (1 Korintus 12:26; Roma 15:1; 1 Korintus 8:17)

C. Gereja Adalah Pengantin Kristus

Baca 2 Korintus 11:2-4; Galatia 1:8;

8. Kesetiaan apakah yang diharapkan daripada gereja sebagai pengantin Kristus? Jadi, pengantin Kristus, kita mesti sangat berhati-hati tentang apa? (2 Korintus 11:2-4)

9. Selain dari hidup suci, hal lain apakah yang perlu diperhatikan oleh tubuh Kristus? (Galatia 1:8)

10. Bagaimanakah Tuhan menggambarkan perhubungannya dengan umat Tuhan? Apakah yang dituntut daripada pengantin Kristus? (Yesaya 62:4)

11. Apakah yang dipentingkan oleh rasul Paulus daripada gereja? (1 Korintus 13)

12. Apakah yang menjadi masalah gereja Efesus? (Wahyu 2:1-7)



Renungan Peribadi

Bagaimanakah anda boleh menguatkan tubuh Kristus? Jawab soalan-soalan di bawah dan kemudian berdoa kepada Tuhan agar Dia memberi anda kebijaksanaan dan karunia untuk menunaikannya.

Karunia-Karunia Rohani Saya	Bagaimana Saya Boleh Saling Memperlengkapi Tubuh Kristus?	Apakah Yang Boleh Saya Lakukan Untuk Membangun Anggota-Anggota Tubuh Kristus?



Tulislah doa dalam kad hati yang digunting daripada kadbod. Doa anda mesti didasari pada apa yang anda tulis dalam renungan peribadi. Simpanlah hati ini untuk mengingatkan diri anda agar tubuh Kristus boleh diberkati selalu.

Yesus Tuhan, Hakim Orang Hidup dan Mati





Ayat Mas Alkitab

“Kiranya Dia menguatkan hatimu, supaya tak bercacat dan kudus, di hadapan Allah dan Bapa kita pada waktu kedatangan Yesus, Tuhan kita, dengan semua orang kudus-Nya.” (1 Tesalonika 3:13)



Kata-kata Mutiara

Bila tiba Hari Tuhan, dan di dalam dunia terdengar nafiri berbunyi, serta Tuhan Yesus datang dalam kemuliaan-Nya, waktu aku dipanggil, aku menjawab: Ya. Semua orang akan dipanggil, sudahkah anda siap selalu?



Aktiviti Bersama

Simbol dan Lambang

Bahagikan kumpulan anda kepada dua kelompok. Satu kelompok akan menggambarkan simbol-simbol atau gambar-gambar mengenai kedatangan Tuhan Yesus yang pertama kali. Golongan yang kedua akan melambangkan kedatangan Tuhan Yesus pada kali yang kedua dengan simbol-simbol. Mereka boleh merujuk kepada Alkitab untuk mencari lambang-lambang. Contohnya untuk kedatangan pertama kali: Gembala, Penyelamat; dan kali kedua sebagai Hakim...Setelah beberapa minit, kedua-dua kelompok akan menjelaskan simbol-simbol yang dipakai oleh mereka dan menjelaskannya.



Renungan Firman Tuhan

Perjanjian Tentang Kedatangan Kristus Yesus

1. Apakah yang telah dijanjikan oleh Kristus Yesus sewaktu Dia kembali ke syurga? (Yohanes 14:3)
2. Apakah yang dijanjikan oleh dua orang yang berpakaian putih sewaktu Tuhan Yesus naik ke syurga? (Kisah Rasul-Rasul 1:11)
3. Kedatangan Tuhan Yesus akan disaksikan oleh siapa? (Matius 24:27,30)

Tanda-Tanda Yang Mendahului Kedatangan-Nya

4. Bagaimanakah manusia akan hidup menjelang kedatangan Kristus? (2 Tesalonika 2:3)

5. Jelaskan tanda-tanda yang akan terjadi sebelum kedatangan Kristus Yesus? (Matius 24:8-12, Markus 13:12)

6. Fenomena alam apakah yang memberitahu kita bahwa kedatangan Kristus Yesus sudah mendekat? (Mat. 24:6.7, 29)

Penghakiman Orang Yang Hidup Dan Mati

7. Mengapakah kita harus selalu hidup menjunjung dan memuliakan Tuhan dalam hidup kita? Rom 14:9-12

8. Apakah yang akan Tuhan Yesus lakukan apabila Dia datang pada kali keduanya? (2 Timotius 4:1; Wahyu 20:11-15)

9. Bagaimanakah segala pekerjaan yang kita lakukan untuk Kristus Yesus akan diketahui pada akhir zaman? (1 Kor 3:9-15)

Kebangkitan Tubuh Kita

10. Apakah yang akan terjadi kepada tubuh orang yang beriman kepada Tuhan Yesus? (1 Korintus 15:44)

11. Mengapa tubuh baru yang diterima oleh orang beriman itu dikatakan suatu kemenangan? (1 Korintus 15:51-55)



Renungan Peribadi

Mengetahui tentang kedatangan Kristus Yesus merupakan hal yang sangat penting bagi orang Kristian dan yang belum menjadi Kristian. Baca Firman Tuhan dan tuliskan apa yang anda akan lakukan setelah menyedari kebenaran ini.

Orang Kristian	Orang Yang Belum Kristian
Luke 12:35-37	Markus 13:35,37
1 Korintus 1:7,8	2 Petrus 3:9, 10
2 Petrus 3:11	Yudas 1:14,15

Saya akan _____

Santapan Minda

Lagu Rohani Indonesia


Satu kali akan ada, hari senang buat saya,
Seperti Tuhan sudah kata,
Asal aku tinggal setia,
Tuhan Yesus sudah janji
Dia sungguhkan kembali,
Bertemulah di udara, Oh, betapa girang.



Doa

Mintalah Tuhan untuk menolong kita selalu menyalakan pelita kita dan bersiap sedia untuk kedatangan Tuhan Yesus. Minta kuasa dan karunia Tuhan untuk hidup berkenan dan melayani sehingga kedatangan-Nya.

Alkitab, Buku Terlaris





Ayat Mas Alkitab

“Jika orang mengenal Engkau, satu-satunya Allah yang benar, dan mengenal Yesus Kristus yang sudah Engkau utus, maka mereka mendapat hidup sejati dan kekal. (Yohanes 17:3)



Kata-kata Mutiara

Alkitab itu Firman Allah yang memberitakan kasih-Nya yang agung untuk kita dan kehidupan kekal yang diberikan dalam Kristus Yesus.



Aktiviti Bersama

Kuiz 5 Minit

1. Ada berapa kitab yang terdapat dalam Alkitab? _____
2. Ada berapa kitab yang terdapat dalam Perjanjian Lama? _____
3. Ada berapa kitab yang terdapat dalam Perjanjian Baru? _____
4. Kitab manakah yang terpanjang dalam Alkitab? _____
5. Bab manakah yang terpanjang dalam Alkitab? _____
6. Berapa jumlah perkataan yang terdapat dalam Alkitab?
a. 1,326,101 b. 773,692 c. 189,614 d. 65,278
7. Apakah dua bahasa yang digunakan untuk menulis Perjanjian Lama?

8. Bahasa apakah yang digunakan untuk menulis Perjanjian Baru?

9. Alkitab dituliskan oleh 40 orang yang berbeza. Namakan tiga penulisnya.

10. Siapakah orang yang pertama kali menterjemah Alkitab ke dalam Bahasa Inggeris untuk orang awam?



Renungan Firman Tuhan

Kalau kita ingin memiliki hidup yang mengenal Tuhan dengan akrab, kita perlu merenungi firman Tuhan dan berusaha menerapkannya dalam

kehidupan kita. Petrus seorang pengikut Tuhan Yesus berkata, “Tuhan, kepada siapakah kami akan pergi? Perkataan-Mu adalah perkataan hidup yang kekal.” (Yohanes 6:68)

Tahukah anda kalau anda membaca tiga bab Alkitab satu hari dan lima bab pada hari Ahad, anda akan menyelesaikan pembacaan Alkitab dalam satu tahun? Kalau anda membaca dua bab Perjanjian Baru setiap hari, anda akan menyelesaikan Perjanjian Baru dalam masa kurang daripada dua puluh minggu.

Sekarang bacalah Mazmur 1, renunginya lalu tuliskan maksudnya untuk hidup anda dan bagaimana anda menerapkannya.

Ayat Mazmur 1	Renungan	Penerapan



Renungan Peribadi

Kalau anda sungguh ingin mengenal Tuhan, anda mesti membaca Alkitab setiap hari. Cari waktu untuk membaca Alkitab dan anda boleh menyelidiki Alkitab dengan menggunakan buku-buku renungan. Sewaktu anda merenung Alkitab, baca dengan penuh harapan kerana Tuhan akan bersabda dan mengubah kehidupan anda.

Keputusan Saya

Saya _____ akan membaca Firman Tuhan setiap hari selama _____ (jam/minit) pada waktu _____ (pagi/tengah hari/malam). Saya akan datang dengan sikap yang penuh harapan kerana saya mahu Tuhan bersabda kepada saya. Setelah saya mendapat berkat daripada Tuhan, saya akan menyalurkan berkat kepada anggota-anggota keluarga saya, peserta-peserta persekutuan mahupun kawan saya.

Tandatangan

Tarikh

Santapan Minda

“Segala tulisan yang diilhamkan Allah memang bermanfaat untuk mengajar, untuk menyatakan kesalahan, untuk memperbaiki kelakuan dan untuk mendidik orang dalam kebenaran.” (2 Timotius 3:16)



Doa

Berdiri dalam lingkaran dan berdoa untuk diri anda dan teman-teman yang lain, agar setiap orang akan membuat komitmen untuk membaca Firman Tuhan seperti yang telah dijanjikan mereka kepada Tuhan.

Alkitab, Bolehkah Ia Dipercayai?





Ayat Mas Alkitab

“Janji Tuhan adalah janji yang murni, bagaikan perak yang teruji, tujuh kali dimurnikan dalam dapur peleburan di tanah.” (Mazmur 12:6)



Kata-kata Mutiara

Alkitab mempunyai bukti dari dalam dan luar. Ia boleh dipercayai dan telah diturunkan dengan tepat dari zaman ke zaman.



Aktiviti Bersama

Keputusan Mahkamah

Drama dari mahkamah telah merumuskan beberapa hal tentang bukti luar dan bukti dalam.

1. Bukti luar

- Ribuan manuskrip tersedia untuk perbandingan.
- Setiap manuskrip dicatat dengan sungguh berhati-hati oleh ahli Taurat dan tidak ada kesalahan atau cacat cela.
- Bukti-bukti arkaeologi menceritakan bahawa banyak hal yang ditulis dalam Perjanjian Lama memang wujud.

2. Bukti Dalam

- Kesatuan cerita mengenai Tuhan itu wujud sekalipun ia ditulis oleh empat puluh orang yang berbeza latar belakang dan jangka waktu yang hampir 2,000 tahun.
- Alkitab juga mengatakan bahawa ia telah diilhamkan oleh Allah. (2 Timotius 3:16)

Kedua-dua bukti ini telah memberitahu kita bahawa Alkitab adalah tepat secara sejarah. Alkitab adalah firman Tuhan,

Berdasarkan keputusan mahkamah ini, bahagikan kumpulan anda kepada empat atau lima kumpulan.

- Bayangkan anda seorang wartawan yang baru keluar dari Mahkamah Tinggi Kuala Lumpur. Anda akan menulis satu artikel dalam Berita Harian bahawa Alkitab adalah Firman Tuhan setelah ia dibicarakan.
- Beri judul yang menarik. Setiap kumpulan boleh menulisnya bersama dan kemudian artikel ini akan dihiaskan pada papan gereja anda untuk anggota gereja anda.



Renungan Firman Tuhan

Latihan memadankan ayat-ayat Alkitab di bawah ini mungkin akan menolong anda menemui beberapa ayat-ayat yang sesuai dengan keadaan hidup anda sekarang. Firman Tuhan dapat memenuhi keperluan kita. Sambungkan garis dengan keadaan yang dijelaskan oleh ayat-ayat di bawah.

- | | |
|--------------------|---|
| 1. Mazmur 56:1-4 | Ketekunan |
| 2. Ibrani 6:9012 | Memerlukan lebih banyak iman |
| 3. Matius 11:28 | Ketakutan |
| 4. Matius 28:19-20 | Ingin memuji Tuhan |
| 5. Wahyu 21:4 | Memerlukan penyertaan Tuhan dalam pelayanan |
| 6. Mazmur 147 | Keraguan dan ketakutan akan maut |
| 7. Matius 21:21-22 | Mahu mengucap syukur kepada Tuhan |
| 8. 2 Korintus 9:15 | Memerlukan rehat |



Renungan Peribadi

Ramai orang mempercayai Alkitab itu Firman Tuhan tetapi mereka tidak pernah menerapkannya dalam kehidupan sehari-harian. Selidiki ayat-ayat Alkitab di bawah dan lihat apa yang perlu kita lakukan dengan Firman Tuhan. Untuk penilaian, letakkan sangat bagus kalau anda melakukannya, sederhana kalau anda melakukannya sesekali, dan tidak baik kalau anda tidak pernah melakukannya.

Ayat-ayat Alkitab	Mengenal Firman Tuhan Melibatkan:	Penilaian Saya
1. Lukas 8:15		
2. Ulangan 17:19		
3. Ezra 7:10		
4. Ulangan 11:18a		
5. Yosua 1:8		

Santapan Minda

Aku bergembira atas segala petunjuk perintah-Mu
seperti atas segala harta,
Aku hendak merenung semua titah-Mu
dan mengamati-amati jalan-Mu,
Aku akan bergemar dalam semua ketetapan-Mu,
Firman-Mu tidak akan aku lupakan,
Singkaplah mataku supaya memandang
keajaiban-keajaiban Firman-Mu,
Firman-Mu pelita kakiku dan terang bagi jalanku.



Doa

Fikirkan beberapa hal untuk menjadi bahan ucapan syukur anda seperti Firman Tuhan boleh dipercayai, Firman Tuhan diberikan kepada kita untuk menjadi pelita kaki kita, Firman Tuhan dapat menghibur, Firman Tuhan dapat memperbaiki kelakuan kita, Firman Tuhan memberitahu kita tentang sifat Allah, Firman Tuhan memberitahu kita tentang kasih Allah dan Firman Tuhan menolong kita hidup berkenan kepada Tuhan.

Setiap orang boleh sebut satu hal dan semua orang akan mengucap syukur sebulat suara tentang hal ini.

Panduan Pembimbing

Sesi 1: Allah Bapa, Pencipta Langit dan Bumi



Objektif-Objektif Sesi

1. Mengenal pasti persepsi mereka mengenai Allah.
2. Untuk menyelidiki pandangan Alkitab bukan hanya mengenai Pencipta semua ciptaan yang wujud tetapi Pencipta yang mengasihi mereka dan memanggil mereka untuk menjadi anak-anak-Nya.
3. Memberi respon dalam iman dan kasih mereka kepada Pencipta dan Bapa Syurgawi.



Pencetus Minat (1) Pengenalan Pengakuan Iman Rasuli

Anda boleh memperkenalkan Pengakuan Iman Rasuli kepada peserta-peserta anda sebagai pendahuluan dan permulaan dalam buku ini. Beritahu peserta-peserta anda bahawa Pengakuan Iman Rasuli ini merupakan pengakuan yang paling tua tetapi yang paling baik untuk meletakkan dasar iman untuk orang yang percaya kepada Tuhan.

Para peserta sebenarnya sangat berbakat. Anda boleh menyuruh mereka untuk membuat satu lagu, rap atau membaca sambil menunjukkannya dalam bahasa isyarat setelah membaca Pengakuan Iman Rasuli sebagai satu projek kelompok mereka.



Pencetus Minat (2)

Ambil cap jari setiap peserta sebelum kelas bermula dalam kertas mahjong kemudian dihiasi dengan pelbagai bunga kering, pelbagai jenis daun. Kemudian suruh peserta-peserta anda untuk meneka cap jari siapakah di atas kertas itu.

Kemudian jelaskan kepada peserta bahawa Tuhan telah menciptakan seluruh alam dan binatang-binatang. Manusia adalah mahkota ciptaan-Nya iaitu ciptaan-Nya yang tertinggi. Ciptaan-Nya begitu istimewa sehingga cap jari kita pun berbeza dan unik. Pengakuan Iman Rasuli menggambarkan Allah sebagai Bapa dan Pencipta kita.



Aktiviti Bersama

1. Tanyakan pelajar-pelajar anda, “Kalau anda diberikan kesem-

- patan untuk memilih bapa duniawi seperti anda memilih buku-buku dari rak, jenis bapa apakah yang akan anda pilih?
2. Galakkan mereka untuk menulis sebanyak mungkin ciri-ciri yang diinginkan mereka daripada seorang bapa.
 3. Kemudian bincang dengan peserta-peserta anda. Tulis jenis bapa yang mereka mahu pada papan putih. Contohnya kalau mereka berkata mereka mahu bapa yang peka kepada masalah mereka, tulis perkataan kepekaan.
 4. Arahkan perhatian mereka kepada perkataan-perkataan yang tertulis pada papan yang juga menjelaskan sifat Allah sebagai Bapa. Jelaskan bahawa walaupun ada persamaan antara Bapa Syurgawi dan bapa duniawi, jelaskan bahawa juga terdapat perbezaan. Kita akan menyelidiki firman Tuhan tentang Allah sebagai Pencipta dan Bapa sebentar lagi.



Renungan Firman Tuhan

Tuhan Pencipta

1. Tuhan ialah Pencipta semua yang wujud di bumi - dari hujung ke hujung. (Kejadian 1:1; Yesaya 40:25-28)
2. Tuhan tetap Allah yang kekal dan hidup. Kita tidak tersembunyi daripada Diri-Nya. (Yesaya 40:25-28)
3. Saya akan selalu bersyukur kerana Tuhan telah menciptakan saya istimewa dan dahsyat. (Mazmur 139:13-14)
4. Pencipta yang mencipta saya juga mengasihi saya. (Yeremia 31:3)

Tuhan Bapa Kita

5. Kita menjadi anak Allah melalui penebusan Anak-Nya yang kita terima. (Galatia 4:4-7)
6. Roh Allah yang memampukan kita memanggil Allah sebagai Bapa kita. (Roma 8:15)
7. Dia memberi pertolongan, menjaga kita, dan melindungi kita. (Mazmur 121)
8. Tuhan adalah seperti Bapa Penyayang kita yang selalu mengampuni kita dan yang panjang sabar. Dia mengasihi anak-anak-Nya yang menghormati-Nya. (Mazmur 103:8-14)
9. Tuhan akan menyambut anak yatim yang ditinggalkan oleh ibu bapa mereka dan melindungi mereka. (Mazmur 27:10)
10. Selaku Bapa kita, Allah juga akan mendisiplin kita dan mendidik kita kalau kita berbuat kesalahan. Dia akan menghajar kita seperti seorang bapa yang mengajar anaknya demi kebaikan-Nya. Kita akan selalu menghormati Bapa kita dan menurut disiplin-Nya.

(Ibrani 12:5-11)

Penjelasan Selanjutnya: Kita mungkin tidak mempunyai bapa yang kita ingini tetapi kita mempunyai Bapa Syurgawi yang mengasihi kita dan mengetahui semua yang kita perlukan dan masalah kita. Kita perlu menghormati Bapa Syurgawi kita selalu, walaupun Dia sungguh sabar.



Renungan Peribadi

1. Minta mereka memikirkan tentang apa yang dipelajari oleh mereka mengenai Bapa Syurgawi. Mereka harus menuliskan respon mereka kepada Tuhan dalam bentuk sepucuk surat. Mereka mungkin terharu bahawa Allah sebagai Bapa Syurgawi mengasihi mereka dan mengambil berat tentang mereka. Mereka mungkin juga sedang menghadapi masalah tertentu dan perlu menerima disiplin Bapa Syurgawi dengan positif.
2. Kalau mereka telah berbuat salah terhadap Bapa Syurgawi, suruh mereka meminta pengampunan daripada-Nya.
3. Biar mereka tahu apa yang ditulis oleh mereka adalah urusan peribadi dengan Tuhan dan tidak ada orang akan membacanya.



Doa

Minta para peserta berdiri dalam lingkaran dan menaikkan doa mereka kepada Tuhan. Suruh mereka mengucap syukur kepada Allah yang telah menjadi Bapa Penyayang yang memerhatikan mereka dan membimbing mereka selalu. Jelaskan bahawa kalau mereka belum menjalin perhubungan dengan Bapa Syurgawi, Dia sungguh rindu akan mereka dan ingin mereka menjadi anak-Nya.



Aktiviti Tambahan

1. Trek Hutan — kalau anda sedang mengajar sekumpulan pemuda-pemudi yang bertenaga, anda boleh membawa mereka pergi ke hutan untuk melihat pelbagai jenis tumbuhan dan alam ciptaan Tuhan.
2. Jangan lupa mengaitkan pemerhatian ini dengan pelajaran yang sedang anda sampaikan iaitu Tuhan Pencipta yang Maha Kuasa dan Bapa Penyayang.

Sesi 2 : Yesus Kristus, Anak-Nya yang Tunggal



Objektif-Objektif Sesi

1. Untuk menyelidiki pemahaman mereka tentang siapakah Yesus.
2. Memahami pengakuan Yesus Kristus tentang Diri-Nya.
3. Memahami kesan pengakuan Yesus atas kehidupan mereka.
4. Merenungi bagaimana mereka boleh bertumbuh dalam perhubungan mereka bersama Yesus.



Pencetus Minat

Pembuatan Poster: Memperkenalkan Yesus

Aktiviti ini akan menolong para peserta menyelidiki kefahaman diri tentang Yesus dan juga memberi peluang kepada mereka untuk bekerjasama serta mencungkil bakat. Bahan-bahan yang diperlukan ialah kad manila, pen marker dan bahan-bahan untuk menghiasi poster.

1. Bahagikan kumpulan anda kepada lima atau enam kelompok. Beri setiap kumpulan kertas mahjong atau kad manila, pen berwarna dan bahan-bahan yang boleh digunakan untuk menghiasi poster.
2. Suruh mereka membayangkan mereka diberikan tugas untuk membuat tugas yang mengiklankan Yesus sebagai jurubicara undangan. Mereka boleh mencerita tentang sifat khas Yesus, gaya kehidupan-Nya dan peristiwa-peristiwa yang menarik dalam kehidupan-Nya yang dapat menarik perhatian pendengar-pendengar.

Pameran Galeri

1. Suruh setiap kelompok memilih seorang pemimpin untuk tampil ke depan untuk menjelaskan poster mereka.
2. Pemimpin mereka harus menjelaskan ciri-ciri khas poster mereka. (jangan lupa memuji mereka)
3. Gantungkan poster-poster yang mereka corakkan di kelas anda agar peserta-peserta dapat menghayati karya seni kawan-kawan mereka.

Penjelasan

1. Banyak orang melihat Yesus sebagai seorang guru yang hebat atau pengasas agama Kristian tetapi tidak ada kaitan atau makna dalam kehidupan mereka.

2. Yang lain pula melihat Dia sebagai watak yang menarik dalam cerita-cerita sekolah minggu tetapi bukan Tuhan yang sungguh-sungguh hidup.
3. Apakah yang dikatakan oleh Alkitab mengenai Kristus Yesus?



Aktiviti Bersama

1. Betul. Dalam Tuhan Yesus diam secara jasmaniah seluruh kepenuhan ke-Allahan. (Kolose 2:9)
2. Betul. Tuhan Yesus sendiri berkata barangsiapa yang melihat Dia juga melihat Bapa-Nya. (Yohanes 14:9)
3. Salah. Tuhan Yesus adalah Gembala baik yang memberi nyawa-Nya untuk domba-domba-Nya. (Yohanes 10:11,15)
4. Salah. Tuhan Yesus mati di kayu salib sewaktu kita masih berdosa dan jadi musuhnya. (Rom 5:7,8)
5. Salah. Tuhan Yesus telah mati di kayu salib dan Dia telah mengalami kesengsaraan sebelum masuk ke dalam kemuliaan. (Lukas 24:26)
6. Betul. Tuhan Yesus telah mati pada zaman pemerintahan Pontius Pilatus.
7. Salah. Tuhan Yesus berkata Dia telah kembali untuk menyiapkan banyak tempat di syurga. (Yohanes 14:6)
8. Salah. Tuhan Yesus duduk di kanan Bapa-Nya. (1 Petrus 3:22)



Renungan Firman Tuhan

- Kajian 1: Tuhan Yesus sudah wujud sebelum Dia dilahirkan sebagai manusia. Sebelum Abraham ada Dia sudah wujud padahal Dia sudah wujud bersama-sama dengan Allah Bapa sebelum dunia ini diciptakan.
- Kajian 2: Tuhan Yesus adalah gambar wujud Allah dan di dalam Diri-Nya kepenuhan ke-Allahan.
- Kajian 3: Tuhan Yesus dilahirkan oleh seorang perawan dan Roh Kudus.
- Kajian 4: Tuhan Yesus mengakui Diri-Nya sebagai Anak Allah. Dia dan Bapa-Nya adalah satu.
- Kajian 5: Tuhan membuktikan bahawa Dia adalah Tuhan dengan begitu banyak mukjizat-Nya. Dia telah menunjukkan kuasa ilahi-Nya atas penyakit, roh-roh jahat, alam dan maut.
- Kajian 6: Tuhan Yesus tidak berdosa. Banyak yang mengenal Dia boleh bersaksi bahawa Dia tidak ada dosa di dalam

Dirinya. (Lukas 23:39-41) dan bahwa Dia sesungguhnya adalah Anak Tuhan. (Matius 16:16)

Penjelasan Lanjut: Apa makna semua ini kepada saya?

Jika Tuhan Yesus adalah Anak Allah, kita akan mendengar kepada segala yang disabdakan-Nya kepada kita. Yohanes 10:10 berkata Dia memberi kita kehidupan yang kelimpahan. Kehidupan yang bebas daripada masalah dan menghadapi masa depan sendiri. Dia akan membimbing, menjaga dan menguatkan kita. Hidup kita akan dipenuhi kehadiran dan kasih serta damai-Nya.



Renungan Peribadi

Berilah waktu kepada peserta-peserta untuk mengisi bahagian ini. Anda boleh menggalakkan mereka untuk berdoa dan bersyukur atas kehidupan yang ditawarkan oleh Tuhan Yesus. Peserta yang lebih dewasa dalam kerohanian boleh menolong peserta-peserta yang lebih baru dan berdoa bersama mereka.



Doa

Anda boleh mengundang satu atau dua pemuda-pemudi untuk berdoa. Suruh mereka berterima kasih dan memuji Tuhan Yesus atas sifat-Nya dan tawaran-Nya untuk hidup bersama mereka agar mereka boleh menempuh kehidupan yang baru dan lebih bermakna.

Dorong mereka untuk menaikkan sepatah dua perkataan yang singkat. Mereka akan merasa gembira kalau mereka menyadari berdoa bukan hal yang sulit.

Anda boleh menutup dalam doa dan mengundang kehadiran Tuhan dalam kehidupan mereka supaya mereka boleh mengalami kesukaan dan kepuasan mengenal-Nya.

Sesi 3 : Kristus Yesus, Tuhan dan Penyelamat



Objektif-Objektif Sesi

1. Memahami karya Yesus di atas kayu salib yang bertujuan menghapuskan dosa dan memberi mereka kehidupan baru di dalam-Nya.
2. Memahami bahawa Yesus tidak hanya ingin menghapuskan dosa mereka tetapi juga ingin menjadi Penyelamat yang tinggal di dalam diri mereka dan menjadi Tuhan mereka.
3. Merenungi sudut kehidupan mereka yang perlu diserahkan di bawah kekuasaan Tuhan.



Pencetus Minat

Pelajaran Melalui Objek-Objek

1. Bawa pengecat kasut putih ke kelas dan ceritakan pengalaman anda sewaktu berada di bangku sekolah. Kita sering membasuh kasut kanvas putih lalu mengecatnya dengan cat ini.
2. Bawa bedak muka wanita. Jelaskan bahawa kadangkala bedak ini dapat menutup bintik-bintik hitam sehingga muka kita memberi penampilan yang lebih menarik.

Penjelasan

1. Kita semua adalah seperti kasut-kasut yang dicat putih, yang kelihatan putih di luar tetapi di dalam masih kotor.
2. Kita mungkin merasa gembira di luar tetapi di dalam kita tidak gembira. Kita dicemari oleh pelbagai dosa dan merasa kehidupan ini tidak bererti. Kita tidak suka diri sendiri dan kita tahu kita tidak seputih yang kelihatan pada lahiriah seperti kasut kanvas.



Aktiviti Bersama

Setelah peserta-peserta anda lakonkan Yohanes 8:1-11 dan ahli teologi membentangkan pandangan teologi mereka, anda boleh menjelaskan konsep dosa.

Alkitab tidak membezakan manusia dalam hal dosa dan mengatakan semua orang sudah berdosa dan jauh dari kemuliaan Tuhan. Kita selalu berfikir hanya orang yang berzina atau ketagihan arak patut direjam

atas dosa mereka. Tuhan Yesus mencabar kita, kalau kita tidak berdosa baru kita boleh mengangkat batu yang ingin kita angkat.



Renungan Firman Tuhan

1. Semua orang telah berdosa dan tidak ada orang yang kudus seratus peratus. Perkataan dosa dalam perkataan Yunani bererti tidak mencapai taraf yang ditetapkan oleh Tuhan. Segala yang kita lakukan tidak mencapai taraf kekudusan Tuhan. Kita telah kehilangan kemuliaan Tuhan. (Rom 10:3, 23)
2. Uph dosa ialah maut kalau tidak ada penyelamatan daripada Allah. (Roma 6:23)
3. Tuhan telah menunjukkan kasih-Nya kepada kita sewaktu kita masih berdosa, Tuhan telah mati untuk dosa kita. (Roma 5: 8)
4. Allah tidak membiarkan kita terperangkap dalam dosa tetapi Dia mengutus Yesus untuk mati di kayu salib agar kuasa dosa dalam kehidupan kita dapat dipatahkan. (Yohanes 3:16-18)
5. Kita perlu menyedari akan hal ini dan bertaubat daripada dosa kita. (Kisah Rasul-Rasul 3:19)
6. Kita perlu berpaling dari segala perbuatan daging seperti percabulan, hawa nafsu, penyembahan berhala, sihir, perseteruan, iri hati, amarah, kedengkian, kemabukan, berpesta pora dan sebagainya. (Galatia 5:19-21)
7. Kita mengasihi Dia dan menurut segala perintah Tuhan Yesus. (Yohanes 14:21)
8. Kita perlu disatukan dengan Tuhan Yesus dalam kehidupan kita dan berbuah bagi Tuhan. (Yohanes 15:3-4)
9. Kita perlu menyerahkan tubuh kita kepada Tuhan sebagai persembahan kepada-Nya. Ini termasuk menyerahkan sikap, tingkah laku dan cara kita menggunakan waktu, (Roma 12:1)
10. Kita bersyukur kerana Tuhan tidak akan meninggalkan kita selamanya. (Ibrani 13:5)



Renungan Peribadi

Berilah beberapa minit kepada peserta-peserta untuk menentukan apa yang tidak berkenan dalam kehidupan mereka. Suruh mereka berfikir bagaimana mereka boleh berubah dari cara mereka kepada cara Tuhan.



Doa

Suruh mereka berdoa dengan salah seorang teman dan meminta agar Tuhan akan memberi mereka hidup yang baru dan kelimpahan. Peserta-peserta Kristian boleh menolong yang bukan Kristian.

Sesi 4 : Roh Kudus, Allah Dalam Kita



Objektif-Objektif Sesi

1. Memahami siapa Roh Kudus dan peranan Roh Kudus dalam diri mereka.
2. Memahami bahawa mereka perlu dilengkapi-Nya dengan kuasa untuk menjalani kehidupan Kristian.
3. Mengambil keputusan untuk memohon-Nya untuk tinggal dalam kehidupan mereka dengan penuh kelimpahan.



Pencetus Minat (1)

Bahagikan peserta-peserta anda kepada dua atau tiga kelompok dan berikan kertas kadbod atau mahjong kepada mereka. Suruh mereka menggambarkan imej-imej yang dapat difikirkan oleh mereka untuk melambangkan Roh Kudus dan pekerjaan-Nya dalam kehidupan umat Kristian. Mereka boleh melukiskan lampu, kawan, angin, guru, buah-buah untuk menunjukkan buah roh kudus, api (kuasa), merpati (damai) dan sebagainya. Mereka harus memikirkan sebanyak mungkin imej-imej dan menjelaskan erti imej-imej ini.



Pencetus Minat (2)

Ilustrasi Dengan Objek

1. Bawa penyuluh/lampu picit. Keluarkan semua baterinya. Pasang lampu picit dan tanyakan kenapa lampu picit itu tidak menyala. Masukkan bateri itu dan kemudian pasang lampu itu.
2. Tiup balon dan menanyakan apakah yang masuk ke dalam balon itu.
3. Walaupun ini merupakan pertanyaan yang mudah, gunakannya untuk memberi ilustrasi tentang Roh Kudus yang boleh tinggal di dalam kita dan memenuhi kita dengan kuasa ajaib.



Renungan Firman Tuhan

1. Dua perenggan ini menunjukkan bahawa Roh Kudus adalah seperti angin yang menghembus. Perkataan “*ruach*” melambangkan sesuatu yang tidak kelihatan, dan berkuasa. (Kejadian 8:1; Keluaran 14:21)
2. Pada waktu Roh Kudus datang ke atas Samson, dia sungguh kuat sehingga dia boleh mencabik seekor singa. (Hakim-Hakim 14:6)

3. Roh Tuhan telah memampukan Samuel untuk bersabda bagi Tuhan. (2 Samuel 23:2)
4. Di dalam Yehezkiel, Roh Tuhan telah bersabda kepada nabi Yehezkiel dan memberi dia penglihatan. (Yehezkiel 2:2; 3:12, 37:1)
5. Apabila Roh Kudus ini menaungi nabi-nabi mereka diberikan kuasa, keadilan dan keperkasaan dan menyatakan hukum Tuhan. (Mikha 3:8; Yesaya 42:1)
6. Roh Kudus bukan hanya dijelaskan sebagai angin tetapi Tuhan yang tinggal di dalam mereka yang menerima Penyelamat. (Yohanes 3:8)
7. Roh Kudus dianggap sebagai Penghibur yang mengajar kita, membimbing kita dan menolong kita hidup dalam kebenaran. (Yohanes 14:26)
8. Roh Kudus meneguhkan dan menguatkan batin kita, dan menolong kita memahami betapa dalam dan lebar kasih Allah. (Efesus 3:16-20)
9. Roh Kudus memberi kita pelbagai karunia-karunia Roh Kudus untuk melayani tubuh Kristus. (1 Korintus 12:4-11)
10. Kita akan tahu bahawa kita hidup dalam Roh Kudus kalau kita menghasilkan buah-buah Roh Kudus seperti kasih, sukacita, damai sejahtera, kesabaran, kemurahan, kebaikan dan kesetiaan. Sebaliknya buah daging seperti kedengkian, kemabukan, penyembahan berhala, permainan sihir dan roh pemecah tidak wujud di dalam diri kita. (Galatia 5:19-23)



Renungan Peribadi

Berilah waktu untuk para peserta merenungi adakah selama ini mereka hidup dalam Roh Kudus atau dalam daging. Jelaskan bahawa kalau diri kita sendiri bertakhta dalam pusat kehidupan maka kita hanya akan menghasilkan buah-buah daging. Kalau mereka membiarkan Roh Kudus bertakhta, buah-buah Roh Kudus akan dihasilkan dalam kehidupan mereka.



Doa

Bimbing kumpulan anda untuk beribadah. Minta setiap peserta menyambut kepenuhan Roh Kudus dalam kehidupan mereka untuk menguasai mereka sehingga buah Roh Kudus dan karunia Roh Kudus dapat melengkapi mereka untuk hidup dan melayani Tuhan.

Sesi 5 : Gereja Tuhan, Kudus dan Am



Objektif-Objektif Sesi

1. Memahami bahawa Gereja ialah tubuh Kristus yang terdiri daripada umat Tuhan yang beriman dan mempercayai Yesus sebagai Penyelamat.
2. Memahami bahawa mereka sama penting dan setiap mereka mempunyai peranan dan bahagian tertentu dalam tubuh Kristus.
3. Menolong para belia mengambil langkah untuk memupuk rasa kekeluargaan dengan gereja dan persekutuan pemuda-pemudi.



Pencetus Minat (1)

Aktiviti ini akan menolong pemuda-pemudi menceritakan kefahaman mereka tentang gereja. Aktiviti ini memerlukan tempat yang luas agar peserta-peserta boleh bergerak.

1. Suruh mereka mencari peserta lain yang memakai pakaian yang berwarna sama atau memakai seluar panjang...
2. Mereka akan berbincang dengan pasangan mereka tiga soalan:
 - a. Apakah yang muncul dalam benak fikiran anda sewaktu perkataan gereja disebutkan?
 - b. Apakah perkara baik yang paling anda sukai mengenai gereja?
 - c. Apakah perkara yang paling anda tidak sukai mengenai gereja?
3. Setiap kali anda berkata "**rojak**", semua orang akan bertukaran pasangan mereka dan berbincang soalan-soalan yang sama.
4. Setelah beberapa pusingan perbincangan, bincang bersama mereka tentang jawapan mereka. Jawapan mereka mungkin lucu ataupun serius. Jawapan mereka juga akan menggambarkan kekuatan atau kelemahan kefahaman mereka tentang gereja.



Pencetus Minat (2)

1. Kalau anda ada video klip gereja-gereja negara lain dan ibadah mereka, anda boleh tunjukkan kepada peserta-peserta anda.
2. Sampaikan ciri-ciri khas atau keistimewaan gereja-gereja ini.



Pencetus Minat (3)

1. Mereka boleh mengadakan sandiwara singkat yang lucu. Contohnya gereja sebagai keluarga, klub, kilang...menurut konsep kelompok mereka. Sandiwara itu boleh berjudul gereja menurut kelompok... (nama kelompok itu).
2. Setelah itu bincang dengan mereka tentang gereja.

Penjelasan

1. Ramai orang selalu berfikir gereja itu sebuah bangunan. Anda boleh membuat rujukan kepada perbincangan mereka.
2. Alkitab telah mengajar bahawa gereja itu bukan satu bangunan tetapi ia merujuk kepada sekumpulan orang yang menerima Kristus Yesus sebagai Penyelamat mereka.
3. Gereja ialah tubuh dan pengantin Kristus yang terdiri daripada jemaah yang telah mempercayai Dia. Apakah kehendak Tuhan untuk tubuh Kristus dan pengantinnya? Mari kita selidiki Firman Tuhan untuk memahami selanjutnya.



Renungan Firman Tuhan

1. (a) Tuhan Yesus digambarkan sebagai kepala jemaah. Tubuh Kristus digambarkan sebagai tubuh Kristus yang telah diselamatkannya atau sekumpulan orang yang percaya kepada Yesus sebagai Penyelamat dan Tuhan. (Efesus 5:23)
(b) Setiap anggota tubuh Kristus adalah berlainan dan setiap anggota mempunyai peranan yang berbeza. Namun, setiap anggota harus dianggap sebagai penting dan perlu belajar saling memperhatikan sesama. (Roma 12:4,5)
3. Allah memberi setiap anggota gereja peranan mereka yang berbeza. (1 Korintus 12:18)
4. Tuhan ingin tubuh Kristus-Nya untuk bertumbuh bersama-sama dalam kesatuan dan kasih serta saling memperhatikan. (1 Korintus 12:25)
5. Setiap anggota tubuh Kristus harus saling memerlukan dan tidak ada orang yang boleh dianggap tidak penting. (1 Korintus 12:20-23)
6. Semua jawapan betul.
7. Persekutuan gereja yang diharapkan oleh rasul Paulus ialah mereka saling bergantung, saling membantu dalam penderitaan, saling menolong, dan yang kuat menolong yang lemah. (1 Korintus 12:26, Roma 15:1; 1 Korintus 8:17)

8. Tuhan ingin tubuh Kristus hidup suci dan setia kepada-Nya. (2 Korintus 11:2-4)
9. Tubuh Kristus harus setia kepada ajaran Firman Tuhan yang tepat. (Galatia 1:8)
10. Gereja diharapkan hidup berkenan kepada Tuhan. (Yesaya 62:4)
11. Rasul Paulus ingin anggota tubuh Kristus mengutamakan kasih dalam kehidupan mereka, dalam sikap mereka terhadap sesama dan juga terhadap Tuhan. (1 Korintus 13)
12. Walaupun tubuh Kristus di Efesus sungguh rajin melayani. Mereka tidak sabar terhadap mereka yang berpura-pura menjadi rasul tetapi pendusta, namun Tuhan telah mencela gereja Efesus kerana mereka telah meninggalkan kasih mereka yang pertama. (Wahyu 2: 1-7)



Renungan Peribadi

1. Guntingkan kadbod dalam bentuk daun dalam pelbagai warna dan membagikan kepada semua peserta.
2. Suruh para peserta menuliskan peranan yang akan dimainkan oleh mereka dalam tubuh Kristus. Mereka boleh menuliskan peranan yang akan dimainkan oleh mereka dalam persekutuan pemuda-pemudi.
3. Suruh berfikir terlebih dahulu sebelum menulisnya.



Doa

Suruh mereka berdoa dan mendedikasikan apa yang dituliskan dalam kadbod kepada Tuhan serta memohon Tuhan untuk menolong mereka dalam peranan mereka. Berdoa untuk pertumbuhan dan persekutuan mereka dalam tubuh Kristus.



Aktiviti Tambahan

Anda boleh mencadang agar peserta-peserta anda pergi berkelah bersama. Setiap orang boleh membawa makanan dan minuman mereka bersama. Sewaktu berkelah mereka boleh saling membagi berkat daripada firman Tuhan selain makan bersama. Ini satu langkah untuk memupuk persekutuan dalam tubuh Kristus. Kalau peserta anda orang dewasa, anda boleh mencadang makan malam di restoran.

Sesi 6: Yesus Tuhan, Hakim Orang Hidup dan Mati



Objektif-Objektif Sesi

1. Untuk mempelajari tentang kedatangan Kristus Yesus yang kedua kali.
2. Untuk mempelajari tanda-tanda yang mendahului kedatangan Kristus Yesus.
3. Untuk menyedari akan Hari Penghakiman untuk orang yang hidup dan mati.
4. Untuk selalu bersiap sedia bagi kedatangan Kristus Yesus.



Pencetus Minat

Tunjukkan filem 2012 untuk beberapa minit kepada peserta-peserta anda. Jelaskan bahawa kedatangan Tuhan Yesus tidak diketahui tahun atau tarikhnya, namun ada tanda-tanda jelas menjelang kedatangan-Nya yang kedua kali.

Tanyakan peserta-peserta soalan-soalan berikut:

1. Adakah anda pernah menunggu untuk seseorang yang terlambat datang?
2. Bagaimanakah perasaan anda?
3. Apakah yang anda lakukan sewaktu menunggu kedatangannya?
4. Berapa lamakah anda sanggup menunggu?
 - a. Di klinik menunggu doktor gigi kerana sakit gusi.
 - b. Di restaurant menunggu kekasih anda yang terperangkap dalam kesesakan jalanraya.
 - c. Di lapangan terbang untuk menyambut kepulangan anak anda yang menuntut di Amerika Syarikat selama tiga tahun.

Penjelasan

Tuhan Yesus berjanji bahawa Dia akan kembali ke dunia ini lagi namun kita tidak tahu bila dia akan kembali lagi. Walaupun kita tidak tahu bila Dia akan kembali, kita tetap menunggu kedatangan-Nya dengan setia.



Aktiviti Bersama

Contoh Lambang-Lambang Kedatangan Yesus Pada Pertama Kali
Palungan di kandang

Kayu Salib
Gembala
Tongkat Gembala
Mahkota Duri
Roti yang dipecahkan
Darah yang tercurah

Contoh Lambang-Lambang Kedatangan Yesus Pada Kali Kedua

Mahkota
Takhta Mulia
Raja
Hakim
Anak Manusia



Renungan Firman Tuhan

1. Sewaktu Tuhan Yesus kembali lagi ke dunia ini, Dia berjanji akan membawa kita kembali dan di sana Dia akan menyediakan banyak rumah. (Yohanes 14:3)
2. Tuhan Yesus akan kembali lagi dalam awan sama seperti cara Dia diangkat ke syurga. (Kisah Rasul-Rasul 1:11)
3. Kedatangan Yesus dalam kemuliaan-Nya akan disaksikan oleh semua bangsa dan manusia. (Matius 24:27, 30)
4. Manusia tidak akan hidup dalam kebenaran, mereka akan murtad dan sesat. (2 Tesalonika 2:3)
5. Pada waktu itu akan timbul banyak penganiayaan, kita akan dibenci kerana nama Tuhan Yesus. Selain itu juga akan timbul banyak nabi-nabi palsu dan menyesatkan banyak orang sehingga timbul banyak kedurhakaan. (Matius 24:8-12, Markus 13:12)
6. Fenomena alam yang tampak pada waktu itu ialah peperangan akan tercetus dan juga khabar-khabar tentang perang. Selain itu, matahari akan menjadi gelap, bulan tidak akan bersinar dan bintang akan berjatuhan. (Matius 24:6-7, 29)
7. Kita semua akan menghadap takhta pengadilan Allah dan memberi pertanggung jawab tentang diri sendiri kepada Allah. (Rom 14:9-12)
8. Tuhan akan menghakimi semua orang mati, kecil atau besar, menurut perbuatan mereka berdasarkan apa yang tertulis pada kitab itu. (2 Timotius 4:1; Wahyu 20:11-15)
9. Semua pekerjaan dan kesejatiannya akan diuji pada akhir zaman. Pekerjaan yang tidak sungguh-sungguh akan terbakar dan mengalami kerugian walaupun orang itu terselamat. Namun orang

yang menyesatkan orang lain akan dicampak ke dalam api. (1 Korintus 3:14-15; Matius 13:41)

10. Tubuh kita akan diubahkan menjadi tubuh rohaniah. (1 Korintus 15:44)
11. Tubuh rohaniah dikatakan sebagai satu kemenangan kerana tubuh itu tidak dapat dibinasa mahupun diubah. (1 Korintus 15:51-55)



Renungan Peribadi

Beri beberapa minit untuk peserta-peserta anda mencari ayat dan mencatatnya. Jelaskan bahawa mereka akan menandatangani apabila mereka bersetuju dan ingin melakukannya,

Orang Kristian-Hendaklah selalu bersiap sedia dan berjaga-jaga. (Lukas 12:35-37), selalu bersandar pada karunia Tuhan sebelum kedatangan Tuhan (1 Korintus 1:7,8), selalu hidup suci (1 Petrus 3:11).

Orang Yang Bukan Kristian-Berjaga-jaga dan menerima Tuhan Yesus (Markus 13:35, 37), Tuhan sedang menunggu dengan sabar agar kita bertaubat (2 Petrus 3:9, 10), menyedari ada hari penghakiman dan penghukuman (Yudas 1:14,15)



Doa

Biarlah peserta-peserta menenangkan diri untuk memikirkan apa yang telah dituliskan dalam renungan peribadi. Galakkan mereka berdoa dan menyerahkan diri untuk hidup suci sehingga kedatangan Tuhan Yesus yang kedua kali.

Sesi 7: Alkitab, Buku Terlaris



Objektif-Objektif Sesi

1. Memahami bahawa Alkitab ialah Firman Allah yang memberikan kasih-Nya untuk manusia yang dicipta-Nya.
2. Memahami bahawa Alkitab ialah Firman Allah yang memberi mereka hidup dalam Yesus Kristus.
3. Mengesamping waktu setiap hari untuk membaca Alkitab yang dapat menolong mereka mengeratkan perhubungan mereka dengan Tuhan.



Pencetus Minat

1. Siapkan kad dan tuliskan pada kad itu dengan nama-nama kitab: Kejadian, Keluaran, Yosua, Samuel, Raja-Raja, Ezra, Lukas, Kisah Rasul-Rasul, Wahyu.
2. Minta sukarelawan tampil ke hadapan dan mengangkat kad itu untuk dilihat setiap orang.
3. Jelaskan bahawa anda akan menyampaikan bahagian-bahagian utama yang menceritakan kasih Tuhan. Mereka mesti memadankan setiap kad dengan penjelasan setiap bahagian kasih ini.
4. Sewaktu pembimbing menjelaskan bahagian itu, orang yang memegang kad yang menceritakan bahagian itu mesti tampil ke depan.
5. Di bawah adalah penjelasan-penjelasan yang berurutan: menurut kronologis tetapi anda harus campur-adukkan dan menjelaskan tanpa mengikut urutan.
 - a. Tuhan telah mencipta wanita dan lelaki untuk mengenal-Nya dan mengasihi-Nya tetapi oleh kerana dosa kita, kita tidak dapat bersemuka dengan Tuhan. **(Kejadian)**
 - b. Sejak kejatuhan Adam dan Hawa, Tuhan membuat rancangan untuk membawa lelaki dan wanita kepada Diri-Nya. Dia memilih segolongan orang, orang Israel, untuk menjadi umat-Nya dan membawa mereka keluar dari Mesir ke tanah yang baru **(Keluaran)**
 - c. Tuhan menolong umat-Nya untuk menakluk tanah perjanjian, Kanaan supaya mereka boleh menempatkan diri di sana dan menjadi satu Negara. **(Yosua)**
 - d. Dia memberi umat-Nya hukum-hukum supaya mereka mengetahui siapa mereka dan bagaimana menjalani hidup yang taat

kepada-Nya. (**Ulangan**)

- e. Tetapi umat Tuhan ingin seorang raja memerintah mereka dan bukan Tuhan. (**Samuel**)
- f. Umat Tuhan tidak mentaati Tuhan dan terus menyembah dewa-dewa lain. Allah membiarkan mereka dibawa ke negara lain dan Israel dibinasakan. (**Raja-Raja**)
- g. Tetapi Allah mengasihi umat-Nya, Dia membawa mereka kembali ke Yerusalem untuk membangun kembali negara mereka. (**Ezra**)
- h. Apabila waktunya tepat, Allah mengutus Anak-Nya, Kristus Yesus, untuk dilahirkan supaya Dia dapat mati bagi dosa dunia ini. (**Lukas**)
- i. Tuhan memberi Roh Kudus untuk menguasai pengikut-pengikut Yesus untuk ke seluruh dunia dan menyebarkan khabar baik supaya wanita dan lelaki dapat kembali kepada Tuhan Yesus (**Kisah Rasul-Rasul**)
- j. Tuhan akan mencipta syurga dan dunia baru di mana lelaki dan wanita akan datang kepada-Nya untuk hidup dalam kehadiran -Nya dan mengasihi-Nya selama-lamanya. Akhirnya. (**Wahyu**)

Penjelasan

- 1. Tanyakan apakah perasaan mereka kalau mereka dikenali sebagai orang yang paling pandai membuat sesuatu?
- 2. Adakah anda tahu bahawa ada sesuatu di tengah-tengah anda dikenali sebagai yang paling baik di seluruh dunia?
- 3. Tunjukkan Alkitab. Ya, Alkitab. Alkitab merupakan buku yang paling laris di seluruh dunia dan diterjemahkan ke dalam paling banyak bahasa di dunia ini.
- 4. Kenapa begitu banyak orang ingin membeli Alkitab dan membacanya.
- 5. Ya, Alkitab ialah Firman Tuhan dan ia memberi hidup dan bimbingan daripada Tuhan kepada semua orang yang ingin mengikut Tuhan.



Aktiviti Bersama

- 1. 66
- 2. 39
- 3. 27
- 4. Mazmur
- 5. Mazmur 119

6. 773,692
7. Ibrani dan Aramik
8. Yunani
9. Salah satu penulis Perjanjian Baru atau Perjanjian Lama
10. John Wycliffe

Penterjemahan paling awal dilakukan oleh Aldhelm, Uskup di Sherbone di Dorset setelah 700 S.M. John Wycliffe ialah orang yang pertama yang membuat penterjemahan ke Bahasa Inggeris yang mudah difahami oleh orang awam pada 1384.



Renungan Firman Tuhan

1. Untuk renungan Firman Tuhan ajar peserta-peserta melakukan renungan dari Mazmur 1 untuk setengah jam. Mereka boleh pergi ke sudut lain dalam gereja tetapi mesti kembali dalam setengah jam.
2. Anda boleh mengundang peserta untuk menyampaikan berkat dari renungan mereka kepada kelas.
3. Anda boleh menolong peserta-peserta anda melihatkan perbezaan antara orang Fasik dan orang yang benar dalam Mazmur. Orang Fasik adalah seperti serkam, mudah tertiuip oleh pelbagai angin. Orang yang benar adalah seperti pohon yang tertanam di tepi sungai. Dia akan merenungkan Firman Tuhan siang dan malam dan tidak menempuh jalan peminasaan.
4. Galakkan yang untuk lain menyumbang pendapat mereka dan galakkan untuk mengadakan renungan di rumah. Jelaskan bahawa kalau mereka ingin mengenal Tuhan dalam kehidupan mereka, mereka mesti terus membaca Firman Tuhan. Jika mereka membaca tiga bab sehari dan lima bab pada hari Ahad, mereka dapat menyelesaikan Alkitab dalam setahun. Dan jika mereka membaca dua bab Perjanjian Baru setiap hari, mereka akan menyelesaikan pembacaan Perjanjian Baru dalam dua puluh minggu.



Renungan Peribadi

Berilah mereka beberapa minit untuk mengisi komitmen mereka kepada Tuhan. Beritahu peserta-peserta bahawa Firman Tuhan itu pelita bagi kaki kita dan dapat memberi pedoman kepada kehidupan kita.



Aktiviti Tambahan

1. Bagaimana kalau anda mengadakan pertandingan membaca Alkitab untuk menggalakkan para belia membaca Alkitab? Tawarkan hadiah yang menarik. Anda boleh mengadakan beberapa pusingan kuiz mengenai Alkitab.
2. Anda boleh meminta anggota gereja akan untuk menyumbang untuk hadiah tersebut.



Doa

Minta mereka berdiri dalam satu lingkaran dan berdoa agar setiap orang akan mempunyai keinginan mahu membaca Firman Tuhan, sama seperti yang telah mereka janjikan (melalui janji di Renungan Peribadi) kepada Tuhan.

Sesi 8: Alkitab, Bolehkah Ia Dipercayai?



Objektif-Objektif Sesi

1. Mempelajari bahawa kalau kita tinjau dari sudut sejarah, Alkitab telah dituliskan dan disalurkan sepanjang sejarah dengan tepat berbanding dengan banyak dokumen-dokumen yang dituliskan pada waktu yang sama.
2. Tunjukkan bahawa bukti dalam atau luar membuktikan kepada kita bahawa Alkitab boleh dipercayai.
3. Jelaskan bahawa mereka perlu bertumbuh dalam Firman Tuhan dan menjadikannya sebahagian daripada kehidupan mereka.



Pencetus Minat

Drama: Alkitab Dibela

Bahan-bahan yang diperlukan:

Skrip, dua meja, dua Alkitab, kertas-kertas lama, sepasang kaca mata yang besar dan kuno, penyodok, penukul.

Aktiviti ini adalah perbicaraan (secara pura-pura) untuk menentukan sama ada Alkitab boleh dipercayai. Anda akan berlakon sebagai peguam bela dan anda memerlukan 4 peserta untuk mengambil bahagian dalam aktiviti ini dan salah satunya harus menjadi hakim.

Tiga saksi ialah:

1. Sarjana Alkitab - Dia akan mengambil satu Alkitab besar.
2. Sejarahwan - Dia akan memakai kaca mata besar dan kuno serta masuk ke dalam mahkamah dengan setumpuk kertas-kertas lama.
3. Ahli arkaeologi - Dia akan datang dengan penyodok yang besar.
4. Sarjana Alkitab - Rina

Susunan Kelas

1. Susun kelas anda untuk menyerupai mahkamah.
2. Anda memerlukan sebuah meja dan sebuah kerusi untuk hakim dan kerusi di samping untuk saksi.
3. Para juri anda boleh terdiri dari semua peserta kumpulan atau diwakili oleh beberapa orang yang anda pilih. Jika anda memilih beberapa orang, anda perlu meletakkan kerusi di samping.
4. Anda memerlukan sebuah meja lagi untuk menghadap hakim bagi diri anda dan juga peguam bela. Letakkan sebuah Alkitab besar di atas meja untuk melambangkan yang terdakwa.

5. Perkenalkan orang yang akan mengambil bahagian dalam perbicaraan ini.

Penjelasan

Jelaskan kepada peserta-peserta anda bahawa mereka akan mempelajari tentang Alkitab melalui perbicaraan mahkamah ini. Tanyakan mereka, “Sungguhkah anda yakin Alkitab ini tepat; ia sudah dituliskan sejak zaman dahulu? Jelaskan bahawa pada hari ini anda akan meletakkan Alkitab untuk perbicaraan di mahkamah dan mereka akan memutuskan untuk diri sendiri sama ada Alkitab yang disalurkan dari zaman ke zaman boleh dipercayai dan tepat.

Skript: Alkitab Dibawa Ke Perbicaraan. Drama Di Mahkamah

Hakim masuk dengan penukul di tangannya. Dia duduk dan menukul meja dengan penukulnya.

Hakim: Perbicaraan dimulakan sekarang. Tuan-tuan dan puan-puan daripada pihak juri, kes sangat jelas. Di sana pendakwa (tunjukkan telunjuk ke Alkitab). Beberapa dakwaan telah difaillkan terhadapnya kerana ia sebuah buku yang tua, apa yang dituliskan mungkin tidak tepat dan tidak dapat dipercayai.

Penguaru bela, Cik Rosie, akan membela dan membuktikan bahawa hal ini tidak benar. Pada akhir perbicaraan ini, anda akan memutuskan sama ada Alkitab mempunyai cukup bukti bahawa ia boleh dipercayai.

Penguaru Bela: Terima kasih, Yang Arif, saya akan memanggil saksi saya yang pertama, Encik Hee, Profesor Sejarah di University Maranatha. (Encik Hee yang memakai kaca mata yang besar masuk ke mahkamah sambil memegang setumpuk kertas)

Encik Hee oleh kerana Alkitab masih dalam perbicaraan, anda tidak boleh bersumpah di atasnya. Anda cuma boleh angkat tangan dan berjanji untuk memberitahu hanya yang benar, seluruh yang benar, tidak ada lain kecuali yang benar.

Encik Hee: Saya bersumpah. (Angkat tangan, semua kertasnya terjatuh ke lantai)

Penguam Bela: Terima kasih, Encik Hee. Bolehkah anda memberitahu mahkamah ini bukti-bukti apakah dari sejarah yang dapat anda buktikan bahawa Alkitab boleh dipercayai?

Encik Hee: Lihat semua kertas ini (tunjukkan kertas kepada hakim dan juri). Sekalipun kita tidak mempunyai naskah-naskah Perjanjian Lama dan Perjanjian Baru, kita memiliki beribuan naskah manuskrip yang dicatat menurut yang asli. Tidak ada buku kuno lain yang memiliki begitu banyak manuskrip yang asli. Tahukah anda semua manuskrip ini dicatat dengan tepat dan beribuan naskah telah dicatat? Orang-orang yang mencatat ini pasti sakit mata atau tulang belakang!

Penguam Bela: Terima Kasih Encik Hee. Apakah benar mereka juga menghitung setiap ayat dan abjad dari skrol lama.

Encik Hee: Ya benar. Seorang Kristian boleh mengangkat Alkitab dan dengan bangga mengatakan ini memang Firman Tuhan.

Penguam Bela: Terima kasih Encik Hee. Anda sudah banyak menolong kami. Saya akan memanggil Encik Yusuf, seorang arkaeologi dari Universiti Harvard. Encik Yusuf bolehkah engkau memberitahu mahkamah apakah yang anda lakukan untuk kehidupan sehari-harian?

Encik Yusuf: Saya seorang arkaeologi dan tugas saya ialah menggali dan mengkaji barang-barang purba.

Penguam Bela: Encik Yusuf, ada orang mengatakan banyak hal dalam Perjanjian Lama tidak pernah wujud. Oleh kerana itu Alkitab tidak wujud dan tidak boleh dipercayai.

Encik Yusuf: Mereka semua salahlah! Apa yang kami gali ini menunjukkan Alkitab memang tepat. Ingat tak dalam 2 Raja-Raja 20:20 tentang bagaimana Raja Hezekia membuat satu terowong untuk membawa air ke dalam kota ketika orang Asyur menyerang mereka? Orang berkata terowong tidak pernah wujud. Tetapi kami menemuinya. (Katanya sambil mengangkat penyodoknya.) Ada lagi! Ukiran di kubur menunjukkan hamba-hamba orang Ibrani sedang meletakkan batu

bata dan juga kami ada gulungan dari Lautan Mati.

Penguam Bela: Encik Yusuf, tentu anda ada banyak yang boleh dibuktikan dalam mahkamah ini. Kami perlu memanggil seorang saksi yang lain untuk memberi kesaksiannya. Kita akan memanggil sarjana Alkitab, Rina untuk bersaksi.

(Rina berdiri dan berjalan ke tempat saksi)

Rina, bolehkah anda memberi kesaksian dan keahlian anda untuk membuktikan Alkitab ini tepat.

Rina: Alkitab telah dituliskan oleh empat puluh penulis dan jangka waktunya selama 2,000 tahun. Biasanya kalau anda mengambil sepuluh penulis dan menyuruh mereka menulis, tentu mereka akan menulis berlainan.

Penguam Bela: Jadi, bagaimana pula dengan Alkitab? Adakah ia berbeza?

Rina: Ya, tentu berbeza. Sekalipun Alkitab dituliskan pada zaman dahulu oleh pelbagai penulis, (angkat Alkitab dan tunjukkan bagus dengan telunjuk) subjeknya tentang Tuhan tidak pernah berubah-Siapa Dia dan apa yang dilakukan-Nya untuk manusia.

Peguam Bela: Rina adakah Alkitab membuat sebarang pengakuan?

Rina: Alkitab berkata semua firman diilhamkan oleh Tuhan. Itulah sebabnya semua pencatat telah mencatat Firman Tuhan dengan begitu berhati-hati kerana mereka tidak mengingini sebarang kesalahan.

Penguam Bela: Terima kasih Rina. Saya tidak ada pertanyaan yang selanjutnya atau saksi yang lain.

Hakim: Terima kasih peguam bela. Para juri, kes ini telah dibentangkan dan semua bukti telah dikemukakan. Apakah keputusan anda semua? Adakah Alkitab boleh dipercayai atau tidak?

Juri: Jawapan



Renungan Firman Tuhan

Latihan memadankan ayat-ayat Alkitab mungkin dapat menolong anda menemui ayat-ayat yang sesuai dengan masalah anda. Sambungkan dengan garis:

- | | |
|--------------------|---|
| 1. Mazmur 56:1-4 | Ketakutan |
| 2. Ibrani 6:9-12 | Ketekunan |
| 3. Matius 11:28 | Memerlukan rehat atau kelegaan |
| 4. Matius 28:19-20 | Memerlukan penyertaan Tuhan dalam pelayanan |
| 5. Wahyu 21:4 | Keraguan dan ketakutan akan maut |
| 6. Mazmur 147 | Ingin memuji Tuhan |
| 7. Matius 21:21-22 | Memerlukan lebih banyak iman |
| 8. 2 Korintus 9:15 | Mahu mengucapkan syukur kepada Tuhan |



Renungan Peribadi

- | | |
|------------------|--|
| 1. Lukas 8:15 | Menyimpan Firman Tuhan dalam hati dan berbuah |
| 2. Ulangan 17:19 | Taat kepada Tuhan dan tidak menyimpang dari Firman-Nya |
| 3. Ezra 7:10 | Melakukan Firman Tuhan serta mengajarnya |
| 4. Ulangan 11:18 | Saya jadikan Firman Tuhan sebagai pegangan hidup |
| 5. Yosua 1:8 | Saya merenungi Firman Tuhan siang dan malam |



Doa

Galakkan setiap peserta untuk menyebutkan satu hal tentang Firman Tuhan yang boleh disyukur oleh mereka. Anda juga menyumbang satu hal dan menutup sesi doa ini.

Tutup sesi ini dengan doa syukur kepada Tuhan kerana banyak dokumen dan bukti-bukti telah tersedia untuk kita dan kita dapat dengan bangga mengatakan Alkitab tidak bercacat cela.

Dapatkan kesemua 25 buah buku dalam
siri **OBOR BELIA** dari kami!



Hubungi kami di wawasan.penabur@gmail.com
atau layari laman web kami di www.wawasanpenabur.org

OBOR BELIA

Siri buku OBOR Belia yang diterbitkan oleh Wawasan Penabur Sdn. Bhd. ini mengandungi tema-tema utama iman Kristian dan isu-isu praktikal yang dihadapi oleh pemuda-pemudi zaman sekarang. Sebanyak 25 buku dalam Siri OBOR Belia yang merangkumi kurikulum 5 tahun telah dirancang untuk kegunaan pemuridan dan persekutuan belia.

Ada empat kategori utama untuk siri OBOR ini: *Asas-asas Iman, Kehidupan dalam Kristus, Isu-Isu Praktikal dan Cara Menghadapi Kepercayaan-Kepercayaan Lain*. Semua pelajaran telah ditulis dengan lengkap dan sistematik, mengandungi ajaran Alkitab yang kukuh, bersifat interaktif dan sedia digunakan oleh para pembimbing dan belia.

Buku yang ketujuh, **"Aku Percaya (Pengakuan Iman Rasuli)"** bertujuan untuk menolong para belia memahami doktrin dasar iman Kristian. Yesus pernah bersabda bahawa kalau kita ingin membangun rumah, kita mesti mempunyai landasan yang kukuh dan tahan lasak. Iman yang kukuh akan berdiri teguh di tengah-tengah angin badai dan taufan. Bangunan iman yang didirikan di atas pasir akan roboh apabila ajaran palsu mengancam. Pengakuan Iman Rasuli bermula dengan permulaan segala sesuatu iaitu Allah Bapa Pencipta langit dan bumi, kepercayaan tentang Anak-Nya yang tunggal, Roh Kudus dan diakhiri dengan hidup yang kekal. Buku ini akan mencabar anda untuk membangun landasan iman yang kukuh dalam kehidupan anda.



"Pendekatan buku ini sungguh segar. Aktivitinya yang kreatif dapat menawan minat belia. Kurikulum OBOR Belia yang ditulis menurut konteks kebudayaan Malaysia serta memberi penekanan praktikal sungguh berguna bagi pertumbuhan belia. Saya yakin bahawa kurikulum ini akan menolong mereka untuk berdiri teguh dalam iman, dan membimbing mereka untuk menyumbang terhadap pembangunan masyarakat yang bermoral, bersifat penyayang dan berperihatin."

Rev Danil Raut, Presiden Sidang Injil Borneo (SIB) Semenanjung

"Didiklah orang muda menurut jalan yang patut baginya, maka pada masa tuanya pun ia tidak akan menyimpang dari pada jalan itu" (Amsal 22:6).

"Masa depan gereja di Malaysia sangat bergantung kepada bagaimana kita mempersiapkan dan memuridkan generasi muda kita hari ini. Mereka adalah aset gereja yang sangat berharga dan merupakan calon pemimpin dalam pelayanan gereja pada masa akan datang. Kita memerlukan bahan pemuridan yang sistematik, menyeluruh dan menekankan pengajaran Firman Tuhan untuk melahirkan satu generasi yang kuat dan berdaya saing dalam dunia yang sangat mencabar ini. Saya ingin mendorong gereja-gereja berbahasa Malaysia dan Orang Asli (OA) menggunakan OBOR Belia ini untuk tujuan memperdalamkan pemahaman Alkitab dan pembentukan supaya mereka boleh bertumbuh sebagai pengikut Kristus. Siri buku ini akan membantu melahirkan generasi muda orang Kristian yang mantap di Malaysia."

Alfred R. Tais, Setiausaha Eksekutif Komisi Bahasa Malaysia,
National Evangelical Christian Fellowship (NECF)